

AR LAZER DIOUALLERIEN DENNET

Daouzek krim amzavet, deuz a zeiz voarnugent tamallet.

YAOUANKIZ AR MUNTRER

Baoue ma eo krouet ar bed,
Emesk an dud den neuz guelet
Ken euzuz, ken terrupl muntrer
Evel an torfetour Vacher.

N'he c'heuillin ket a boen da boen,
N'he hent a zo re a vouullen ;
He gavout a ran goall zotruz,
Hag 'spen siouaz goadielluz !

Dreist beg va skoa hag deuz a bell
A dolin voarnezan eur zell ;
Rag me a gred mont tost dezan
A ve noazuz da bep unan.

E ker Beaufort, 'barz an Iser,
Eo ganet Vacher, ar muntrer,
Pemzek de goude an Oll-Zent,
Mil eiz kant nao hag tri-ugent.

E biannik guella ma voa
Da ober drouk, da n'em ganna ;
Ne c'helle ket, hervez he c'hoant,
Beza trech' d'he voall zantimant.

Neuze an esper dont abenn
Da reisad dezan, he geren
He gassaz da c'hounit he voued,
Mez ne jomaz neb lec'h ebet.

O veza klanv voar he vele, (1)
Eun Tad Marist zeuaz eun de
D'he velet, hag a gomzeaz
Dezan deuz Jesus hag ar Groaz.

Vacher reaz van d'he zelaou,
Hag n'eur ziplant dezan eur gaou,
Lavar neuz c'hoant da jench buez,
Hag da vont n'he Gompagninez.

Heb difizianz, er gouent voa
Digemeret, hag 'pad daou vloa
Eo bet enn'hi, mez n'elle ket
Beva didrouz 'mesk ar Freret.

Divoar neuze a n'em dolaz
Da redek voar an henchou braz,
Da c'hortoz ken zeu ar mare
Da vont da zoudard heb dale.

(1) Ar p'eb brassa, deuz ar verz-ma, a zo
tennet deuz he vuez, skrivet gantan he-unan.
(Sonjezonou Vacher.)

ER REGIMANT

Da genta, voa deut ar vicher
Da reisad da gorf ar muntrer,
Mez heb dale gouezaz an dro
En n'he bleg fall hag divalo.

Kredi a re e voa an oll
Klask noazout dezan hag he goll ;
Ne zavare koulz lar deuz den,
Nemet goall zellou vije ken.

Pa gomze e vije gant drouk ;
Lavaret re troc'hi ho gouk
Da gemen hini a grede
Dizamzao ar pez lavare.

Deut a voa he gamaladet
Na greden mui mont da gousket,
Heb lakat ho bagnetezen
Tost dezo, prest da n'em ziffen.

En amzer ma voa caporal,
Falvezaz ober eun tol fall
Da unan deuz he zoudardet,
A voa Leon Vaze hanvet.

Divezatoc'h pe voa serjant,
A neuz digant eur plac'h yaouank
Laket devez da zimezi,
Pa zeuaz da jench sonj dezi.

Neuze Vacher gant ar goler,
A gemeraz eur revolver,
Hag losk voarnezi pevar denn,
Ken gouezaz ar plac'h voar he fenn.

Dre c'hras Doue n'o drouk ebet,
Digant ar spont hi voa kouezet ;
Mez Vacher sonjal voa maro,
C'hoanteaz n'em laza d'he dro.

N'he benn a dennaz daou volod ;
Kemeret goude evit sod,
Voa reformet, hag d'ar c'haban
Renk monet an despet dezan.

Pevar bloaz vez o ket pell,
Ben an de kenta viz Ebrel,
A zeuaz er mez ac'hano
Evit monet da vale bro.

AN DROUK-SPERET

An deiz-ze d'an abardaë noz,
An diaoul dindan speç eun den koz,
Zeu da c'houlen gantan ober
Eur pennadik hent en he zer.

He gorf voa distruij, askornek,
He zremm euzuz, he vek skilfek,
He zaoulagad 'vel diou c'hlaouenn
A lugerne gouelek he benn.

« Vacher, emezan, c'hui zo bet
Digant an dud goall zisprijet,
Hag Doue zeu d'ho tro brema
D'ho choaz evit ho c'hzatiza.

C'henillet piz va gourc'hemennou,
Kerzit breman dre an henchou,
N'ho torn eur gontel digor braz,
Grit ma zono ar c'bleer glaz.

Lec'h vez o laouennedigez,
Digasset an dristidigez ;
Lec'h vez o tud hag n'em garo,
Laket ar maro etrezo.

N'o pezit ket aon evel kent,
Me a n'em gavo voar ho hent,
Vit o kuza pa viot klasket,
Hag o tiffen pa vez o red.

Neuze goumanso evidoc'h
Eur vuez nevez hag kaeroc'h ;
Deuz Doue c'hui vez o c'hevel,
Peguir lakefot da verval. »

Evel ma tigouezont neuze,
En eur c'broaz-hent hen a loske
Eur skrijaden, hag ker buan
Vacher voa dare he hunan.

Monet a ra dre ar bed oll,
Demeuz ar Zao d'ar C'huz-Eol,
Deuz ar C'breiz-De d'an Anter-Noz,
En n'eur skuila he voall valoz.

Hag kemen lec'h m'eo tremenet,
Henvel deuz eur bleiz kounaret,
A neuz losket roud he skilfou
Goadiellet 'barz ar c'hrimou.

EUR RENKENNAD SPONTUS

Seiz sizun eon de 'vit de,
Goude voa lezet da vale,
A lazaz an hini genta :
Ejeni Delorm, ugant vloa.

Er bloaz mil eiz kant pevarzek
Hag pevar ugant, d'an naontek
Euz a viz Mae 'vit beza skler,
Neuz he lazet e Beaurepair.

D'an ugant devez a viz Du,
Etre skilfou an den didru,
D'he zrikek vloa Louiza Marcel,
Kichen Dragignan renk mervel.

D'ar bloaz voarlec'h, daouzek e Vae,
E kichen Dijon adare,
Laz Augustina Mortureuz,
Nemet seitek vloaz c'hoaz a neuz.

E Miz Eost deuz ar memez blos,
E ker Sant-Ours, 'barz er Savoia,
Neuz lazet intavez Moran,
Epad ma voa tibri he c'hoan.

Eiz devez goude, ar muntrer
A lazaz Vitor Portalier,
Hag d'an ugant a Vengolo
Alin Alais, Kichen Bourdo.

D'an nao voarnugent, neuz lazet
Ar zeivet Per Massot Pellet ;
Tri Miz goude, eun intavez,
An eizvet renk koll he buez.

An navet voa Mari Meunier,
An dekvet Rosina Rodier,
Eun intavez c'hoaz, an unek
Neuz lazet er bloavez seitek.

Eun den yaouank a zeitek vloa,
Eo an daouzek, an diveza
Deuz an torfejou amzavet
Gant ar lazer potret denvet.

Heman Claud Beaupied he hano,
Voa 'vel Vacher o vale bro,
Pa n'em erruont assamblez
Da vont da gousket eun nosvez.

Ho daou neuz tremenet an noz,
N'eur c'hoz ti dilezet, digloz,
En distro, voar bord eun hent don,
E kichen ar ger a Lyon.

Ho daou e voan da c'houlou de
Ebarz ar porz, prest da vale,
Pa zaillaz Vacher voarnezan,
Eur razouer digor gantan.

He c'houzouk n'eun tol neuz troc'het,
Hag ar c'horf maro neuz tolet
Ebarz eur punz gant mellou mein,
Lec'h ma eo kavet anter vrein.

Kredi a rer, neuz a c'hent-all
Gret c'hoaz kalz a dorfejou all,
Na fell ket dezan amzavout,
'Vit klask savetei he c'houzouk.

TRAOU EUZUZ

Cetu aman e berr gomzou,
Penoz a neuz gret he grimou,
Oc'h ho n'em gemer peurvuya
Er memez fason d'ho laza.

Ober reaz van da dremen
Heb tol evez dre ho c'hichen,
Hag pa vije deut tost dezo,
N'eur lamm a zaillaz voarnez.

Kerkent he gontel n'em gavaz
Etre he zaouarn digor braz,
Hag diganti sko gant kounar,
Ken gouzezen siouaz d'an douar !

Gant he zent neuze, n'he arrach,
A beg, a zispenn, a chigach
Ar c'horfou, ken a zeu ar goad
Deuz he c'hinou da ziverad !

Gant spont a grener, o klevet
Ar stad euzuz eo bet kavet
Ar c'horfou gonde ho maro ;
Ne voar ket 'vit sellet outo !

An darn vuya a voa, siouaz,
Divelc'houget, hag goassoc'h c'hoaz :
Dispennet gant dent ar muntrer,
Hag gret viltansou n'ho c'henver !

GOAL EURIOU DAOÙ ZEN HONEST

Darn deuz he grimou a zo bet
Da dud innosant tamallet,
Pere a neuz 'vit kemen-se
Gouzanvet an trista bue !

Eun den honest Grenier a zo
Tamallet digant tud he vro,
Da veza lazet, pebeuz euz !
Augustinaïk Mortureuz !

Chuech sizun eo bet er prizon,
Kasset dirag lesvar Dijon,
Pehini a neuz gret neuze
He lezel buan da vale.

Mez siouaz a bed c'hueorentez
Neuz gouzanvet ac'houdevez,
Ken goall gasset gant tud he vro,
Ma renkaz kuitad anezo.

D'eun all, Bannier voa tamallet
Maro trist Per Massot Pellet,
Douget a voa falz destini
En n'he eneb gant he vroedi.

Dalc'het eo bet 'vit kemen-se
Ebarz er prizon ugant de,
Da c'hortoz ken zeu ar lesvar
Da zilassa d'hen he zaouarn.

Ebarz er ger pa zigouezaz,
Oll dud ar c'harter a ieaz
Gant ar vuhanegoz vrassa,
Hag a c'houdrouz he labeza.

Eur zon a voa savet dezan,
Eur zon mezuz evel houman ;
Ne voar ket dont er mez he di,
Heb klevet kana anezo.

Diou verc'hik a noa mitizien
E ti eur bourc'hiz deuz kichen ;
Digasset voan dezan d'ar ger,
Hag neb lec'h mui n'ho c'hemerer.

Pebeuz poan a renk da c'houzany
He vreg kez, gant ar glac'h ar klanv,
Hag he vugale baour galvet
Muntrieren Per Massot Pellet.

(DA C'HEUILLIA.)

Kolaïk P.

Kavet vezoz an anter diveza deuz ar verz-ma, pa vezoz quelet e pe du a iello an affer ; pe hen a vezoz guillotinet, pe hen a vezoz kemeret evit beza sod.

Voar an anter-ze vezoz quelet c'hoaz halz tud honest tamallet da vezoz gret krimou Vacher. — Penoz eo bet chomet ar muntrer heit all heb beza bet tapet. — He veach a dreuz douar Breiz-Izel. — Ar pez a lavar ac'hanomp. — Abred pe zivezad. — Penoz eo bet tapet evit mad. — Dirag an testou. — Ar muntrer ebarz er prizon. — Ar pez a ra evit klask savetei he benn. — Stad speret ar muntrer. — Meur a grim nevez amzavet. — Ar lesvar. — Petra vezoz gret anezan. — Eur gentel.

KOLAÏK P.